

Polgo Hasia Pas Deli Tesalonaika Dabeba Asęani

Hasia nedebō tau sabo po

Te Tesalonaika moni hanu te nabis bulu dao, te Masedonia moni tō pedai sesegede elaluali. Tama Pol teba sabolama, tama Kraisde po hasia te Juda hani we bidi dabebolo pusali. Augwali hauwa homu hasegelama tama Kraisgo po wali pabo gagalali. Tama te Juda hani isiąwai we bidi augwali me hauwa tama tiali. Tama nosali Pol te Korin hanude bidibadi, agai te Timoti te Tesalonaika hanuba tagala palali. Te Timoti ma asama, tama agai Polbolo te Tesalonaika hani tomode pedalali sę po pusali. Te tibo po ola mabo bage Tesalonaikaba asama, tama Pol nogi posobo po obaso, e pas tomode Polgo aga digi nogi tau sabo po aşəni. Tama boi bidi dabego augwali dene mani goli, te Tesalonaika we bidi augwali Krais bugagia wali pobaso, Pol dwagi yai homu eyu, te Godibolo buba hwi po aşəni. Tama augwaligo te augwa hani isali we bidide homu hauwa ebaso, Polgo te Godigo da gę pageđe ma hodalueibao po augwalibolo wei ponobo po aseyu, tama gasa tau sabo homu bomo mabo po me aşena tolali.

Pol dali aga deli sę ebo bagego me te Tesalonaika hani bagede augwaligo moni homu yali

(Dqj 1-3)

1 ¹Pol, me Sailas, Timoti dali, da bidi selago te po dagebolo aşena tolobao, dage Tesalonaika bulude bidibo we bidibolo. Dage te God Aya me Genuai Bidi Jisas Kraisde wadolama bidibao. God agai dage olo tau selama, tama dage bugagia bidao, dago homugo tebo dao.^a

Tesalonaika we bidi augwaligo God dali konealubo po dą̄ olama, bugagia bidai

²Tigidali sogo dago dage tigidali dali Godibolo buba hwi po weyu, dago bomo eyu, gedu haluasa po dage tau somainogo wabo dao. ³Tama dago Aya Godibolo po obadi, dagego ebo dwagi yai kolesaga te dago

^a 1:1 Tpi 17:1

gegeda pabo menio, te dago ma konebo dao. Dagego Kraisde duga homu tigidali mubaso, tama dagego dwagi yai sə ebo dao. Dagego duga hasi dwagi yai homu eyu, tau siyu eboso, sə dene ebo dao. Tama dwagi yai homu eyu, dagego ‘Dago Genuai Bidi Jisas Krais mu aselama, da tau saibao,’ te homu eyu, tama bomo elama, dagego tonalubo dao. Tama dagego te sə ebo po dago ma koneyu, dago Godibolo buba hwi po wabo dao.⁴ Dago abagi dabe, God agai dage godolo mu eyu, agai dage aga we bidi mu da olama, sa muyu yai dao, te si dago konebo dao. Tama tibaso, dago Godibolo nage usu dao te po wabo dao.⁵ God agai dagebolo te homu yali dago mena tama koneaniwe? Dago te Godigo po dagebolo pusagasali sogo, te olo po dali naga wagasai menio. Te pode Godigo Mobo Bidi agai bomo mu eyu, tama dagego te po mu po dao homu yali, te dagego te pode homu si ebeo. Duga digi dago dage dali hodobo bidiyu tau sabo kolesaga, te dagego konebo dao.⁶ Tama dagego dago kolesaga dali, te Genuai Bidi Kraisgo kolesaga dali te kolesaga si dagego wali pabo gilama. Polobadu augwaligo da dali, Genuai Bidi Krais dali dene mani gilama, dage me Godigo po sobadi, tama dage me dene salio. Dage dene sali goli, te Godigo Mobo Bidi agai dagego homu dwagi yai mu ilalio.^b⁷ Tama tibaso, te Masedonia dali Akaia dali te genuai tə side bidibo Jisas wali pabo we bidi augwaligo dagego te dwagi yai sə yali po odama, tama augwaligo te tiwai inao, te po wai.⁸ Dagego Genuai Bidigo po gasa we bidibolo pusubo te po te digibulu bulude odalio. Te po te Masedonia bulu dali Akaia te bulu side naga te po odai menio. Tigidali bulu bidi augwaligo dagego te Godibolo konealubo po dą̄ wabo po augwaligo odalio. Tama tibaso, dago dagego te sə ebo po te dago augwalibolo ma wagobeo.⁹ Dage bidibo digi da asali sogode dagego yali sə po augwa digi augwaligo dabolo pusubo dao. Augwaligo da dali pusuyu, te po wai, ‘Augwaligo te tibo god tagaliyu, tama augwaligo homu God muba muai,’ te po wabo dao, tama dage bidabo ula sabo te God agai sə bidi dage bidibao, te po wabo dao.¹⁰ Tama augwaligo te po wabo dao, dage te Godigo Ogwa dagalu tagalama e təba ma asobo sogo te dagego tonalubo dao, te po wabo dao. Te Godigo polobadu g̫ pagede ma hodolali bidi, te Jisas, tama te bidi agai da dali Godigo nosali səbə idali weyu tau sali bidi Jisas dao. Dagego te bidi asobo tonalubo po augwaligo dabolo pusubo dao.

Polgo Tesalonaika bulude sə yali po

2 ¹⁻² Dago abagi dabe, polobadu da dage bidibo digi aselama, tama dago yali sə te nai walosiwai sə menio, te dagego koneai dao. Hasia da dage bidibo digi asisəbadi, da Filipai bulude bidibadi, da dene siyu,

tama augwaligo dago tigi doloyu, nogi posobo po weyu yai, te me dagego koneai dao. Tiali goli, da dage bidibo digi aselama, tama God agai da homu kolesaga dą̄ waliyu, tama dago boi bidi sulama, wi eyu didibili homu yai menio. Dago bomo elama, Godigo po dagebolo pusa mawai.^c ³Dago dage dali po ola mobadi, te dago te po doloyu, dwai sę yabo po dali, ili po wabo kolesaga dali, dago te tobage po wabo menio. ⁴Te menio. God agai da osola sulama, tama da usu eboso, tama agai dabolo agai dwagi yai po pusumainogo dabolo te sę mawai. Tama tibaso, dago te po hania hanilama te po pusubo dao. Dago te sę ebo tőde we bidi augwali da dali homu dwagi yai emainogo te sę ebo menio. God agai deligo naga dago te sę ebo godolo emainogo te sę ebo dao. Tama God aga digi dago homu kolesaga tomode osola subo dao. ⁵Dagego koneai, dago te wabo pode dage homu bega somainogo dago te po wabeo. Dago te Godigo po dage dali obadi, dagego nai sainogo dago tibo po dage dali weyu menio. Tama God agai me te sę ebo gedugo suai dao, te po mu po dao waibao. ⁶Tama dago te sę ebo te tőde bidigo dago nogi ugwaba somainogo te sę ebeo, te dage me te gasa bidi me tomode te dago te sę ebeo. Te Jisas Krais aga digi da tagala palali agai sę bidi da bidibadi goli, dago bomo elama, tama dagego dabolo te genuai nogi momainogo dago te sę ebeo. ⁷Te menio. Tialima, da dage dali bidali sogo, da homu nagame yai kolesaga eyu bidali, wego aga wai dabe bugagia tonaluyu negebo tiwai eyu bidai dao. ⁸Tama dago dage godolo mu yai, tama dago Godigo dwagi yai po dagebolo te pusa mawainogo yai. Tama te sę naga menio. Dago dage tau siyu isabo te sisi eyu, te homu me dago yai dao. Magi basowe? Dago dage godolo mu eyu, te homu yai dao. ⁹Dago abagi dabe, da dage tomode bidibadi, dago sę dene ebo te tigidali dagego koneai dao. Tama dago dagebolo Godigo dwagi yai po pusubadi, tama dago te masigi sabo gasagi yai sę yai dao, te siade me hulide me yai dao. Te yali sę dagego koneai dao. Dago te sę magi baso yaliwe? Te dago dagebolo sęgę maidali weyu, dago te sę yai dao. ¹⁰Tama da dage Jisas wali pabo we bidi tomode bidali sogo, dago te gasagi yai mu kolesaga yali. God agai gedude dago yali kolesaga te dwagi yai mu yali. Tama we bidigo gedude dago yali kolesaga te doloba pai mu yali, tama te sę ebadi, magi dwai sę me yai menio. Tama te yali kolesaga dagego sulama, koneai dao. Tama God me agai te dago yali kolesaga sulama, koneai dao. ¹¹Tama dagego koneai, ayago aga wai dabe dari ebo kolesaga tiwai dago me dage deli deli dari yai dao. ¹²Tama dage tulaluidali weyu, dago dagego homu kolesaga tomode hodoloyu, tama dagego homu kolesaga dą̄ waliyu yai. Tama dago bomo elama, dagebolo po mobo maidu geai, te po wai, “God agai dage dari dwagi yai homu emainogo, agai dwagi yai kolesaga mu wali pao. God

^c 2:1-2 Tpi 16:19-24; 17:1-9

agai dage i wali, tama dage aga obo tomode bidiyu, agai genuai ula yai bomo sumainogo agai dage i wai dao,” dago dage dali te po wai.

Augwaligo konealubo po däę weyu, bomo elama, sęęgę dali tolai

¹³Tama tibaso, sesemane sogo dago Godibolo gedu haluasa po weyu, dago nage usu dao po wabo dao. Magi basowe? Polobadu Godigo po dago pedauwalide wabo po dagego odai. Tama te po odama, tama te olo bidigo po dao homu eyu, dagego te po sai menio. Te meni. Te po Godigo po mu dao. Tama dagego te po odoyu, dagego te homu yai, awe, te Godigo po mu dao. Tama te pogo te Godibolo konealubo po däę wabo bidigo homu kolesagade sę bomo mu ebo dao. Te Judia tőde bidibo we bidi meba augwali Godigo we bidi hani mu dao. Augwali te Jisas Kraisde homu däę wali we bidi dao. ¹⁴Dago ama dabe, dage augwali tiwai dao. Augwali te Jisasde homu däę obaso, te Juda bage mebago hagela ebaso, augwali dene mawai. Tama te tiwai dage me duga hanigo nogode dene sai dao.^d ¹⁵Tama te dwai sę yali Juda bage augwaligo Godigo po pusa mani profet budi elama isai, tama augwaligo Genuai Bidi Jisas me eleyu yai. Tama tiyu, augwaligo da me ela guduluyu sela s̄awai dao. Tama augwaligo ebo sęde te Godigo dwagi yai homu isiąwai sę dao. Tama augwaligo tigidali budi dali boi budi mu ebo dao.^e ¹⁶Tama boi budi mu bidiyu, augwaligo dago sę yabo tų pania sabo sę ebo dao. Tama te Juda hani isiąwai we bidi Godigo augwali ma somainogo, dago Godigo po augwalibolo pusainogo ebadi, te Juda bage augwaligo da dali “Te po wagio,” wabo dao. Tama tiyu, augwaligo dwai sę yali te hauwa mu yai dao, te genagi naigo pagawai tiwai. Tialima, God agai moni sęęgę ebo augwali pąba mu bidagasai elalubao.

Pol agai Tesalonaika we bidi augwali ma suabo homu yai

¹⁷Dago abagi dabe, Juda bage augwaligo da dage dali bidibadi ela gudulai dao. Tama tiyu, da aya ida meni yai wai bidibo tiwai yai dao, osogo. Dago dage gesabi subeo. Tialima, dago homu dage dali bidibao. Tama dago dage gesabi suainogo asabo tų gegebo sę bomo mu yai. Dago dage suainogo dago homu bomo mu yai dao. ¹⁸Tama da dage pageba asainogo yai. Ena Pol dao, tama hauwa sogo ena dage bidibo digi asainogo usu sai, te usu menio. Magi baso menio. Te dwai mobo budi Satan agai da asabo tų däę walio.

¹⁹Tama nosali dago Genuai Bidi Jisas e tōba ma asobo sogo te da tőde we bidi aga gesabidide da dolaluabao. Tama aga asobo sogo da dwagi yai homu eyu tonalubo dao. Tama aga asobo sogo dago te dwagi yai nai dali te dwagi yai au yabo nai dali te si waibao. Dago dwagi yai nai dali au

^d 2:14 Tpi 17:5 ^e 2:15 Tpi 9:23, 29; 13:45, 50; 14:2, 5, 19; 17:5, 13; 18:12

yabo nai dali te si de dawe? Te dage tama dao. ²⁰Awe, duga digi te dago dwagi yai au yabo nai dao. Dagede te dago dwagi yai homu mu ilibo nai dao.

Pol agai Timoti te Tesalonaika hanuba tagala palai

3 ¹Te dago dage ma suainogo hauwa sogo tonaluama, tama dago te homu yai, da nosali ma tonalugobeo. Pol me Sailas da si naga te Atens hanude bidaibao homu yai.^f ²⁻³Tama te homu elama, da sigo dago ama Timoti dage bidibo digiba tagala palai. Timoti aga te Godigo sə ebo bidi dao. Aga te Jisas Kraisde po pusubo bidi dao. Da sigo Timoti dage pageba tagala palai, tama agai dage bomo mayu, tama dagego Kraisde konealubo po dą̄ walomainogo, tama augwaligo dage dene mobaso da, dage meba bidi te Jisasgo po tagalidali weyu yai. God aga digi da te dene dali sęgę dali te somainogo, agai da te bodolu mawai. ⁴Awe, polobadu da dage dali bidibadi, te dene dage pageba asisabadi, tama dago te po dage dali odu geai, “Nosali da dene saibao,” wai. Tama te po wali gilama tama tiwai, tama dagego sulama koneai dao. ⁵Tama te dene dage pageba asali baso, tama eno ma tonaluyu gesenge ma egobeo homu eyu, eno bidi me deli dageba tagala palai. Te eno dagego Kraisde konealubo po me dą̄ wabowe, te eno koneainogo te bidi tagala palai. Te dwai sə ebo tomoba kegebo dwai mobo tuni bidi agai dage dali te sə yaliwe eno te homu yali. Agai te sə dage dali egi sogo da, tama dago dage dali yali sə olo dali eyu, te nai walosiąwai sə egi da.

⁶Te da dagede moni homu te tiwai eyu bidali. Tiali goli, Timoti aga dage pageba sabolama, tama dage dali osogo bidiyu, tama agai dage tagasu, megı tama aga da bidibo digi ma asai. Tama aselama, agai dwagi yai po da dali pusai. Dwagi yai po pusuyu, agai te po wai, “Te Tesalonaika dabe augwaligo Godide konealubo po bugagia dą̄ waliyu bidibo dao. Augwaligo augwa hasi godolo mu eyu bidibo dao,” te po wai. Me agai te po wai, sesemane sogo dagego da dage dali bidali sogo homugo ma koneyu, tama dagego da dali dwagi yai homu ebo dao. Tama dagego da suabo homu bomo mu dali elama bidai, te dago dage suainogo ebo homu tiwai dagego me te homu ebo po Timoti agai da sibolo tamadi pusai, megı tama.^g ⁷Dago abagi dede, gasa bidi augwaligo dabolo sęgę dali dene si mayu, tama da isabo tiwai yai dao. Tiali goli, Timoti agai po dabolo pusubaso, tama dago konebao, dagego Godide konealubo po me dą̄ wabo dao. Tama tibaso, da bomo ma selama, bugagia bidibao. ⁸Magi baso menio. Dage Genuai Bidi agai bomode bomo elama, tama aga dali bugagia wadoloyu ebaso, teda te tebogo dago sęgę dali dene dali si aiyaba elaluali. Tama elama, da moni dwagi yai homu elama, da bugagia

^f 3:1 Tpi 17:15 ^g 3:6 Tpi 18:5

bidibao. ⁹Tama tibaso, dagego te dwagi yai sə ebo po odolama, tama God agai da dali te dwagi yai homu kolesaga mabo te səde tama magi ilama dago agabolo te nage usu da po weyu, tiwai si yaibawe? Woo, da usu egobeo. Agai dabolo yali dwagi yai sə, te səgo dago usu da po wabo sə aiyaba mu elalubo dao. ¹⁰Tama hauwa sogo mu dago giligade me, hulide me God dali hanalu wabo po wabo dao, te da dage pageba aselama, dage pagia sainogo. Tama dagego God dali duga homu tigidali mubo sə dwasianu habuge eyu da, te dago ma pąqanainogo dage tau siyu, te po wabo dao. ¹¹Tama dago homugo dago Aya God, aga digi, te dago Genuai Bidi Jisas augwali sigo da dage pageba pabo tū damainogo, dago te po olama, gedu haluasa augwali sibolo hanalobo dao. ¹²Tama dagede, dago homugo Genuai Bidi agai te dagego duga hasi godolo mu ebo sə genuai mu ilimainogo dago hanalobo po wabo dao. Tama me agai dagego te gasa we bidi tigidali augwali dali godolo mu ebo sə genuai mu eyu pąqana palomainogo dago hanalobo dao. Tama te dago dage dali godolo ebo sə gilama dagego te tiwai emainogo dago Genuai Bidi hanalobo po wabo dao. ¹³Tama te Genuai Bidi agai dage te we bidi dali godolo mu ebo səde dąq omainogo, dago aga dali te hanalobo po wabo dao. Tama agai tama tilama, tama nosali dago Genuai Bidi Jisas aga doloba mu pai we bidi tigidali aga dali e tōba ma asobo sogo, te dage me te sogo Godigo doloba mu pai we bidi dago Aya God agai gesabidide bidimainogo, tama dago te Genuai Bidi dali te po hanalobo dao.

Tesalonaika bagego te wiegi yai kolesaga dabe te augwa bidibo side bomo elama pedalumainao wali

(Dqj 4-5)

Mena kolesaga te God agai gedude dwagi yai kolesaga dawe?

4 ¹Dago abagi dede, dago gasa po me elalubo. Tama da te Genuai Bidigo po selo pabo bidi dabe dao. Tama tibaso, dagego e po tudiba muidali weyu, tama dago bomo elama, dagebolo e po megı obao. Polobadu dago te Godigo gedude dwagi yai dolo yai kolesaga ebo po dagebolo ola mawai. Tama dago te tobage po dagebolo ola menama, tama dagego te po odoyu, wali peyu bidibo dao. Tiali goli, megı dago bomo elama, dagebolo e po megı obao, te dagego dene siyu te tobage sə tigidali dagego bugagia mu yao. ²Tama te Genuai Bidi Jisas agai da tau selama, tama dago dagebolo te sə yao po wali, te dagego koneai dao. ³Tama te po page mu e dao, God agai dage dali ebo homu e tiwai, dagego magi dwai sə me isiəma, doloba pai we bidi mu bidao. Tama penani ebo sə dagego egimio. ⁴Tama te dwai sə isiəbo kolesaga bugagia wali peyu, tama we sabo kolesaga dage deligo bugagia koneama, tama tebo kolesaga eyu

bido, God agai homu dage dali te tiwai homu ebo dao. Tama dagego tebo kolesaga, te Godigo kolesaga naga tiwai wali pao, təde we bidi augwaligo ‘Te sə dwagi yai sə dao’ omainogo yao. ⁵Tama we sabo sə te tiwai eyu, tama dagego te God konesiąwai bidi hanigo ebo kolesaga tiwai egimio. Te God konesiąma, augwali augwa dwai sə yabo homu kolesaga wali peyu, te bomogo, te we sabo dao. ⁶Tama God agai ebo homu e dao. Dagego te we sabo sə po bolama, tama duga abagi dali dwai sə egimio. Magi baso menio. Genuai Bidi Jisas agai te tobage dwai sə ebo kolesaga ebo bidi augwali tigidali agai wei ponobo dao. Tama polobadu da dage dali bidibadi, e səgə yai po dao homu eyu, dago te po hanilama, dage dali wai dao, dage tau somainogo. ⁷God agai da i wali, dago te dwai meda yai kolesaga wali pomainogo da i wabeo. Menio. Agai da i wali, te dago dwagi yai doloba pai kolesaga mu wali pomainogo agai da i wai dao.

⁸Tama tibaso, e po odolama ela pabo bidi, te bidi agai e təde bidigo po naga tudiba mubeo. Te bidi agai Godigo po odolama ela peyu, aga tudiba muani bidi dao. Te God agai naga dagebolo te Dwagi Yai Mobo Bidi mani God da, te Mobo Bidi agai dagebolo mani, dage Godigo we bidi mu bidimainogo.

⁹Te eno duga abagi dabe augwalibolo dagego dwagi yai homu ela mabo, te po eno meba asegabeo. Magi basowe? God agai te duga hasi dali dwagi yai homu mabo te kolesaga dagebolo ola menama, tama te kolesaga dagego koneyu bidibao. Tama eno dagebolo te po ma ola magobeo. ¹⁰Tama dagego dwagi yai homu duga abagi dabe te Masedonia tə tigidali tomode bidibo bidi dabe augwali dali ebo dao. Dagego te kolesaga ebaso, God agai te kolesaga dagebolo ola mani, te dago koneai. Tiali ma, dago abagi dede, dago po bomo elama, dage dali obao, tama dagego duga abagi dabe augwali dali dwagi yai homu ebo kolesaga te kolesaga dagego me mu ela pao. ¹¹Dagego homu kolesaga tomode bomo elama, tama dagego homu dwagi yai nagamea peyu, tama duga bidibo bugagia tonaluao. Tama dagego duga digi duga masigi sabo sə yao, dago polobadu dagebolo te po wali gilama. ¹²Dage magi nai me menia sidali weyu, te duga masigi sabo sə yao. Tama te Godigo po wali pisiawai we bidi augwaligo dagego te dwagi yai kolesaga ebo sumainogo, tama dagego homu dwagi yai nagamea peyu, tama duga bidibo bugagia tonaluao.

¹³Dago abagi dede o, edao. Te Godigo po wali pisiawani we bidi augwaligo augwa homu Godiba musiąyu, te isali we bidi ḡu pagede ma hodalo bo sogo augwaligo tonalusiąma, tama te isibo we bidide augwali homu dene eyu, gela mu wabo dao. Tiali goli, dago homugo te Godigo po wali pelama isali we bidide te dagego bugagia koneao. Dagego te buluba bidibo we bidigo gela wabo tiwai waidali weyu, dago e po dagebolo obao. ¹⁴Da tigidaligo te Jisas aga isilama, tama ma hodaloai dao, te

dago te mu po da homu eyu, konealubo dao. Tama tibaso, da tigidali Jisas dali wadoloyu bidibaso, dago e po me konealubo dao, te Godigo te Jisasgo bomode te agai po wali pelama isali we bidi Jisas aga dali ma hodasa sela asaibao.¹⁵ Tama Genuai Bidigo po naga dago dagebolo megı obao. Nosali Genuai Bidi ma asobode, da e təde isisiwani we bidi, da polo hasia polasa te Godigo po odolama, isali we bidi taga peyu da polo pogobeo.^h ¹⁶ Te menio. E tiwai pedalibaob. Te Godigo bomo elama po weyu, tama polalubo genuai ensel mobo bidigo i weyu, tama Godigo moni bu wabo nai biugel po weyu, tama tebo sogo Genuai Bidi Jisas aga digi dagalu tagalama, dulubo gagalaibao. Tama polobadu Jisasde konealubo po dąu olama isali we bidi, augwali polo hasia mu g̃u pagede hodaloibaob.¹⁷ Tama te sogo da təde isisiwani we bidi, Godigo da te ma hodolali we bidi dali pogo odasa dagaluba holaibao, te da te asobo Genuai Bidi tiqba pomainogo yaibao. Tama elama, da te Genuai Bidi Jisas dali sesemane sogo bidada peyu, mu bidada paibao.¹⁸ Te s̄e pedalama, tama da tigidali te tiwai bidaibao. Tama tibaso, dage tomode we bidi meba augwali isibaso, dagego te pogo duga hasi tau siyu, duga homu dąu walao.

Dago sisi elama, Genuai Bidi asobo tonaluao

5 ¹Dago abagi dede o, te da dage dali bidibadi dago dagebolo dago Genuai Bidi asobo po wai. Tama tibaso, agai asobo sogode dago dagebolo po me asegobeo. ²Menio. Duga digi koneai dao, Genuai Bidi asabo sogo te nai wi sabo bidi hulide geme polo asobo tiwai yaibao.ⁱ ³Tama te Godigo po wali pisıwai we bidi augwaligo te po waibao, “Megı te da bugagia bidabo sogo dao, te da dolabo nai p̄aba asogobeo,” te po waibao. Tiali goli, augwaligo te tobage po obadi, sisi isıwai, te sogo digi tama augwali dolabo nai polo augwaliba pedalibaob, augwali noma mu saibao. Te wede ebo s̄e tiwai, we mego wai ame nainogo tigide ebo dene tiwai ebo si pedelaibao, tama te we te dene wi pabo t̄u menio, wi sana pogobeo. Tama te tiwai te Genuai Bidi asobo sogode te Godigo po wali pisıwai bage augwali wi pabo t̄u menio.

⁴Tiali ma, abagi dede, dage hulide bidibo menio, te Genuai Bidi asabo sogo te nai wi sabo bidi tiwai geme eyu, polo aselama, dage noma sogobe. Menio. Dage te hulide bidibe. ⁵Te menio. Dage tigidali we bidi giligade ula dali bidibo dao. Da be hulia sai digi huli tomode me bidibo menio. ⁶Tama tibaso, da sisi eyu, godege piabuo, te gasa sisi isıma godege pibo we bidi tiwai. Tama dago gedu pedaluyu, bugagia tonaluyu, tama dago homu kolesaga wiegi yai mu elama, bido. ⁷Dago koneai, godege pibo bidi augwali hulide pibo dao. Tama bomo yai ąi tulama

aiyoge ebo bidi, te bidi dabe augwali te hulide naga te sę ebo dao. ⁸Tiali ma, da ulade bidibo bidi dao. Tama tibaso, dago homu kolesaga wiegi yai mu elama bidinao. Te hwıbo bidi aga hagawiade te boi bidigo elidali weyu mubo nai tiwai, tama dago Godide konealubo po bugagia selama, we bidi dali dwagi yai homu ebo kolesaga eyu, bugagia bidinao. Tebo sę si te dago hagawiade muabo dila pai nai tiwai dao. Tama Godigo da ma sabo homu bomo eyu, agai te sogo da somainogo dago tonaluinao. Tama te homu kolesaga tiwai, te dago tobolude muabo dila pai kapa madi tiwai dao, te hwıbo sogo da tau somainogo.^j ⁹⁻¹⁰Magi baso menio. God agai da bodolu mani te dago agai homu sębę ebo dago somainogo ebo menio. Woo, agai da sa muyu, te homu yai, augwaligo Genuai Bidi Jisas Krais agai augwali tobade isilama, tama augwali ma saibao, God agai te homu elama, da sa muani. Tama Genuai Bidi aga ma asobo sogo da bidiyu da, ma da isali da, te sogo da aga dali hodobo bida peyu, mu biddada pomainogo, Godigo da sa muani. ¹¹Tama tibaso, duga hasi te pogo duga abagi dabe augwali homu kolesaga dąwaliyu, tau siyu, te po augwalibolo ola mao, tama megi dagego te ebo sę tiwai tama naga yao.

**Po silagasu wabo po tama wali, Godigo te aga po wali pabo
we bidi dabego te dwagi yai kolesaga mu saibao po wali**

¹²Dago abagi dabe, dago dagebolo te po obao, dage tomode Godigo sę ebo bidi dabe dologode dage bida. Genuai Bidi agai te bidi dabe augwali dagego tobolu bidi nigilama bidai, tama te bidi dabe augwaligo Godigo po dagebolo ola mayu, dagego homu kolesaga dodolobo dao. ¹³Dagego homugo augwaligo sę ebo kone palao, augwaligo te sę eyu, dage tau sabo sę dao. Tama dagego augwali dali dwagi yai homu mu elama, augwali godolo mu yao. Tama dagego duga abagi dabe augwali dali deli homu elama bida.

¹⁴Dago abagi dage tuni bidi dabebolo dago po bomo elama dage dali obao. Dagego te sę hagela ebo bidi dabe augwalibolo po bomo elama, augwali homu kolesaga dagego bugagia ma dodolao. Tama te wi ebo bidi dabe augwaligo homu kolesaga dąwala. Tama te bomo meni yai bidi dabe augwali dali dagego dwagi yai kolesaga naga eyu bida, sębę egimio. ¹⁵Gasa bidi dabe augwaligo dage dali dwai sę eboso da, dagego augwali dali te dwai sę ebo wei ponogio. Dagego te tiwai idali weyu, bugagia tonaluao. Tigidalı sogo dagego bomo elama, duga hasi augwali dali dwagi yai sę naga yao. Tama te sę tiwai tigidalı bidi dali me yao. ¹⁶Tama tiyu, sesemane sogo dage dwagi yai homu elama bida, ¹⁷te dagego sesemane sogo gedu haluasa po bida peyu me, God dali po wao. ¹⁸Te dage dali magi sę me eboso da, dagego God dali buba hwi po

^j 5:8 Ais 59:17; Ef 6:13-17

wao. Te dage Krais Jisasde wadolama, tama God agai homugo dagego tama kolesaga emainogo tebo dao.

¹⁹Dagego te Godigo Dwagi Yai Mobo Bidigo sə ebo paligio. ²⁰Bidi dabe augwaligo ‘Te God agai enabolo wali po eno dagebolo pusaibao’ obaso da, teda dagego te po olo sela sagio. ²¹Tialima dagego te tobage po wabo tigidali bugagia osola suo. Tama dwagi yai po naga dagego dąu ola siyu, ²²tama dwai sə tigidali tagalama, sela səyao.

²³Te God aga te dwagi yai homu nagame ebo kolesaga page bidi mu dao. Tama eno homugo te God aga digi dage doloba pai mu ilaibao, aga tiwai bidimainogo yaibao. Tama eno homugo agai dagego homu kolesaga tomode sə ebo mobo bidi me, te dagego noma bidi me, te dagego tigi me God agai bugagia tonaluiba, tama dage dwagi yai mu bidimainogo. Tama dago Genuai Bidi Jisas Krais ma asobo sogo te dage magi dwai sə isiąwai we bidi tiwai bidaibao. ²⁴Tama te dage i wali God agai te sə dage dali mu tiwaibao. Magi baso meni. God agai te tigidali sə yaibao wali, te sə tigidali agai ebo dao.

²⁵Dago abagi dabeo, dagego God agai da tau somainogo gedu haluasa po wao. ²⁶Dagego tede bidibo Godigo we bidi dali dwagi yai homu eyu, tama augwalibolo nogo maiqo. ²⁷Ena da te Genuai Bidigo po sela pabo bidi dao. Tama tibaso, eno dage dali e po obao, eno te asəani po te tigidali abagi dabe augwali dali nedao. ²⁸Eno homugo te dago Genuai Bidi Jisas Krais agai olo tau sabo kolesaga dage dali bidaibao. Ena Pol dao.